

四庫全書

集部

欽定四庫全書

平齋集卷十三

宋 洪咨夔 撰

內制

太中大夫守兵部侍郎淮南東路安撫制置使
兼知揚州軍州事趙葵以護邊無狀乞賜罷
歸不允詔

善射或失於百命中之餘良醫多得於三折肱之後此
操危慮深者所以達也卿早懷智略銳赴事功雖鳴劍

伊吾之志未酬而堅壁細柳之風猶在梁荆倣擾淮獨
晏然涉歷多而識慮老可與圖守矣邊烽少歛亟上歸
請兵法曰母恃其不來恃吾有以待之賊情叵測吾圍
尚疏卿宜日討軍實忠敵王愾其可遽奉身而退乎所
請宜不允

太中大夫守尚書戶部侍郎兼刪修勅令官趙
立夫乞界叢祠不允詔

漢張倉為計相更以列侯主計唐劉晏自度支領租庸

鹽鐵至僕射猶領使如舊理財不宿其官簿書放紛吏
並緣為姦利雖竭江河之入莫供尾閭之泄也卿踐更
中外之久財賦脉絡洞燭表裏而姿稟靜固精力強又
足以行之左戶為真朕方委重閱日幾何遽以春衣
辦集而求均佚蒼晏職業僅以是自諉耶維時調度孔
慾尚寃爾材母曠吾事所請宜不允

朝奉大夫權工部尚書時暫兼權吏部尚書兼
修玉牒官兼侍讀李鳴復辭免除權刑部尚

書日下供職兼職並依舊恩命不允詔

朕惟舜命九官垂作共工臯陶作士皆終其身不易後世必遞遷熟試以觀通材卿為棘卿有明清之風則峻總一臺為臺端有直亮之操則超躋八座為起部有簡靜之譽則併攝天官知卿深故進卿亟也然經遠猶者貴事功之詳歷圖大任者在望實之積孚茲由五雉之華趣典輿鳩之重擢無虛月意蓋有在卿以因人序升而辭過矣其恩式敬爾由獄以長我王國所辭宜不允

中奉大夫寶文閣待制賜紫金魚袋鍾震辭免

除寶章閣直學士知靜江府廣西經畧安撫

恩命不允詔

朕待臣下無中外之間以久不見卿詔自姑熟賜對於便朝議論平實可見於行良用嘉獎攝長起曹詔墨猶濕而噴言已至憮然不得而私也廼眷桂管為管右都會有江山之勝無瘴厲之虐峻直西清往頴牧御過家上冢行道謂榮豈若季布徒以一毀譽為進退哉勉敷

德意使海蠻山獠人懷其生則予以懌所辭不允

朝議大夫權尚書兵部侍郎四川安撫制置使

趙彥呐乞速加汰斥不允詔

西南六十州倚天險以為固卿老於邊籌控仙源之險
以挫賊鋒功與馬服光據北山等朕既下詔獎勞矣而
爾子洸夫又能猶潰旅以紓心腹之憂威名既立賊雖
狼貪無厭羝觸未已獨不忌吾老羆之當道耶進卿武
部之貳且官厥子於朝其體有功見知之意益堅授任

危難之圖收合散亡謹固封守使全蜀以寧毋過爲引咎以自餒其氣也所請宜不允

朝議大夫試尚書工部侍郎沿江制置使兼江南東路安撫使馬步軍都總管知建康軍府事兼行宮留守陳韡乞亟畀祠廩不允詔

天下一身也論病以及國原診以知政漠之蹠盜唐之疽根皆識國體者所深憂朕不能遠德盡然念三垂之不靖北門管鑰徒得鄉重除戎蒐實養威制變靡一政

之不舉再進文昌用懋乃蹟俾脩捍我于艱病在膏肓
日甚一日忽騰祠請殊駭朕聞得非切於憂國以身之
病喻國之病興夫醫緩所視固砭劑所不及秦越人浣
腸滌胃必有可起之方蓋國勢之轉移在人未可諉之
壞症而不爲治也卿亦勉爲王事親藥餌養精神以佩
高危之寄所請宜不允

魏了翁辭免依舊端明殿學士除簽書樞密院
事令疾速赴行在奏事恩命不允詔

采薇以遣戍視薇之剛柔以爲行役久近之候而出車
勞還杕杜勤歸繼之所以閱歷時之勞也間者歲聿云
暮鄉憤於封豕長蛇荐食上國烈然以樞臣視師于江
上星言夙駕宵犯霜露曾無幾微見顏面亦云壯矣吳
楚上下數千里臂指運掉氣勢翕含有出門同人之應
朕寢爲安迺瞻暮春閏時且再勞於王事盍遄其歸在
師中吉序進一等特以示吉甫之燕喜而飲至策勲猶
有待也何行而弭歛戍之後艱何施而杜挺憂之內嘆

何所處置而使朝廷尊強生靈之無失所延英入對其
熟數于前以圖綏靖引疾而辭非朕望所辭宜不允

謝奕昌辭免特授保寧軍節度使提舉萬壽觀

恩命不允詔

我孝宗迪關睢之風重葛覃之本言告師氏間歸謁於
祖禰之庭詔馭羣臣必進寢於伯仲之列著爲國典用
厚人倫鄉笙磬和平珩璜鎮粹清規雅度具存江左之
風嘉則令儀同稟洽陽之氣聯鴈行於朱閣肅鷺序於

彤墀祇奉宮闈還展寢廟榮光接於五世異數萃於一
門超陟齋壇總提真館蓋率先朝之舊匪繇近戚之私
宜益務於好脩母過勤於引避所辭宜不允

謝奕禮辭免特授保康軍節度使提舉萬壽宮
恩命不允詔

朕尊臨函夏夙建長秋化成二南曾無示私外家之意
禮成五廟宜有昭德異姓之恩鄉性行淑均風神秀徹
如圭如璧沂慶派於豹蟬吹壎吹箏播英聲於鶴鷺託

在肺腑鬱爲羽儀奉翟樟而脩寢廟之恭擁旌旄以領
祠庭之秩寵超二等榮動一時以淳熙咸淳之彝章爲
慶元相閣之盛事匪徒馭貴抑以教嫗勉循制節之規
宜畧搃謙之牘所辭宜不允

魏了翁再辭免依舊端明殿學士除簽書樞密
院事令疾速赴行在奏事恩命不允詔

兵難隃度則倍道而疾征事有密奏則乘傳而趣入王
事靡盬所以不遑啓處也國朝儒而知兵莫加於范仲

淹出經畧西事久之未獲要領而占爲副樞定廟謨於
殿陛之間震天聲於靈夏之表卒柔服之鄉腹有萬甲
名齊一韓迺者視師之行協比諸閫拊循三軍有關疆
事既得以直達朕聽今又以所目擊還歸坐籌折箒笞
之好音懷之吾有以待敵矣恢台之交風日未烈其遄
驅以慰渴佇所辭宜不允不得再爲陳請

皇叔祖少傅保寧軍節度使充萬壽觀使嗣秀

王師彌生日詔

十一月十七生

新陽踰節協氣先春生一代之宗英爲兩朝之國老眷
隆列棘恩賁垂蓬備牢餼以陳儀茂燕顧而介壽

同知樞密院事鄭性之生日詔

小寒屆節峻岳儲神應昌運以生賢幹洪樞而贊治特
隆眷遇肇錫餼牽介黃髮之脩齡侈緇衣之篤好

永寧郡王楊石生日詔

紀鳳標春將臨銘栢傳龜毓瑞先慶垂蓬豐好賜於周
官洽燕私於漢戚祗予寵眷介爾耆靈

光祿大夫右丞相兼樞密院使鄭清之再辭免
特進左丞相兼樞密使恩命不允詔

元愷並舉而百揆宅之司空公孤俱立而六典掌之冢
宰大廈必棟梁之任巨川惟舟楫之資允繁具瞻曾微
虛授以卿韞帝師之學抱王佐之材疇績中台升班首
輔蓋欲究致主澤民之業凝調元贊化之功使國勢重
於泰山而人心安於磐石倚毗良切考課匪輕盍亟為
奠枕之圖猶堅執循墻之請人不足與謫也朕正賴于

格心時則勿有間之卿何疑於立政况此艱難之日豈其閑退之時所辭宜不允

宣奉大夫知樞密院事兼參知政事喬行簡再辭免特授金紫光祿大夫右丞相兼樞密使

恩命不允批答

帝賚良弼而輔丕人天生賢佐而祐中興繫一德之交
孚實千齡之幸會卿三朝壽俊四海達尊充於性則碩
大而光明備於身則康寧而壽考如圭如璧之猗重較

久人望之獨隆非龍非彌之遺汝師斯國均之對秉蓋
天所相惟朕之承中外之壞證已形上下之憂心如醉
趣展濟時之畧母貽避事之嫌所辭宜不允

宣奉大夫知樞密院事兼叅知政事喬行簡再
上表辭免特授金紫光祿大夫右丞相兼樞
密使恩命不允仍斷來章批答

朕以治國平天下根本於人主之身深宮暗室左準右
規何嘗一息懈而世道積壞之餘國勢未振物情易搖

中夜以思凜乎若朽索之馭六馬榆塞又將秋矣並建輔弼亟圖康濟免墮游至得無以補苴罅漏扶植頽敝之難耶列聖紀綱法度具在天下事猶可以為卿老於謀國勇於致君調元經武特在機括之一轉趣亮天工用答人望牢辭可已也所辭不允仍斷來章

光祿大夫右丞相兼樞密使鄭清之再辭免特授進左丞相兼樞密使恩命不允仍斷來章

批答

元首明則股肱良股肱喜則元首起相須甚切相值甚
艱卿學足以承三聖之傳識足以定萬世之策適更張
之有待嗟大壞之難圖救病於已危以爾為上醫之盧
扁葺廬於既朽以爾為巧工之班輸特隆左揆之登昭
示右賢之切交孚靡間頻巽奚為瞑眩而厥疾瘳妙試
回生之劑綢繆而彼桑徹熟思禦侮之規母棄爾成亟
祇朕命所辭宜不允仍斷來章

金紫光祿大夫參知政事兼同知樞密院事曾

從龍上表再辭免除知樞密院事兼參知政事恩命不允仍斷來章批答

國朝之治莫盛於嘉祐時則有大臣考覈兵數地理使邊防無闕戍奉典章故事使百官奉法循理而朝廷尊卿之祖也卿山立川流克世厥德茲以參預進本兵之重且世厥官運籌幄中制勝堂上修撰兩盡庶幾海內復還全盛之風詩不云乎對揚王休作召公考此朕所望於卿者撫辭徒費所辭宜不允仍斷來章

41

平
蘇
桂

12

卷之三

平齋集卷十三

欽定四庫全書

平齋集卷十四

宋 洪咨夔 撰

內制

端明殿學士正議大夫同簽書樞密院事陳卓

再上表辭免簽書樞密院事不允仍斷來章

批答

蓋聞宣王中興倚重於孝友之張仲有孝友之臣主於
內則戎車四牡始得以成功伐於外卿踐履全君子之

和操守得大臣之正朕之張仲也自登宥府物望具孚
進不踰等厥任增重夫國勢之安危在所寄邊防疎濶
軍律放紛風寒之慮太深陰雨之備宜亟卿雖位樞庭
之末可過謙乎所辭宜不允仍斷來章

曾從龍再辭免樞密使不允批答

名虎江漢之命姬旦淮夷之征皆爵上公往衛中國欲
威靈之旁暢必名位之崇加卿有武而有文能定而能
應處基命宥密之寄得受任危難之風果為朕行耶趣

進臨於都會吾無復憂矣知坐折於遐衝胡尚遜於使
端似未孚於予志望之重則可以盡護諸將權之尊則
可以獎率三軍矧視周家之禮猶輕其在國朝之典未
遠匪隆總統曷聳觀瞻抑使表裏聯絡之諸屯皆識上
下綱維之深意玆犹孔熾我是用急姑煩籌筆之勞徐
方來庭王曰旋歸佞性命珪之寵倚毗良切區區俛奚勤
所辭宜不允

魏了翁再辭免簽樞督視荆湖兵馬不允斷章

批答

昔在先朝蜀出名輔張浚精忠之山立允文碩畫之淵深皆於王事靡盪之秋克奮元戎啓行之畧朕方深於憂顧卿盍展於英猷荐披謙牘之勤猶遜師干之重睠禁途之獻納暨經廈之建明雖所陳略施未盡如賈誼之志然其策常用已深識子房之心茲共濟於艱難乃過虞於扞格况上流之形勢甚重而中朝之體統不殊精神既孚脈絡自貫甲寅報可亟宜上方略于金城辛

已饗功詎止訖天誅於洄曲倚須戒道勿事循墻所辭
宜不允

曾從龍第二次辭免樞密使都督江淮軍馬不
允斷章批答

易之師正丈人吉非必以素居富貴稱也才謀德業衆
所尊信畏服則國勢倚之而重卿德業之茂才謀之偉
積孚於衆望出分憂寄盡董師干十乘啓行有日矣本
兵置使特壯前茅豈以富貴卿哉况兩相兼官於中元

戎專官於外體貌均一脉絡貫通修扞于艱以敉寧武
圖功蓋在此行虎拜稽首對揚王休母屢勤遜牘為也
所辭宜不允仍斷來章

文武百寮宰臣鄭清之等上表奏請皇帝正月
五日天基聖節御紫宸殿上壽不允批答

朕親攬政柄以來嘉與海內相安于善治而秉德不康
寧無以輯天人之和咎證荐形於象緯妖氛旁煽於疆
陲致使吾民重罹其害夙夜怵厲心焉如擣其敢晏然

盛禮備樂於廷以侈誕彌之慶哉群公百辟盍圖往求
朕攸濟顧援承平舊章以請君曰卜爾萬壽無疆固天
保歸美之至情而嚴恭寅畏天命自度治民祗懼無逸
享國之長在此不在彼也其思將順用副憂勤所請宜
不允

文武百寮宰臣鄭清之等再上表奏請天基聖
節御殿上壽不允批答

誕節之置非古也我朝列聖觀會通以合禮必隨時而

酌損之上天示變則寢同天之祲容萬民失業則蠲天
申之縛典蓋以畏天恤民為心不以位為樂也朕獲承
至尊休德於今一紀露橐獻賀每抑而不進矧今玩荐
雷之象恐懼修省莫敢遑息而可効千秋為宴樂乎約
浮崇簡朕志堅定卿等勿重請也所請宜不允

謝奕昌再辭免授保寧軍節度使提舉萬壽觀
恩命不允仍斷來章批答

后父據春秋襄紀之義帝舅緣大雅申伯之意而外戚

恩澤寢薄其來尚矣卿以相門芝蘭之彥中闈棠棣之
雋蹈履規矩藹有令譽翟車歸謁首建驛旄雖恩數超
出拘撓之表而人不謂過豈特舊章之可循抑官惟其
稱非私昵之及也樊氏世篤陰亦戒侈恂恂苗裔傳龜襲
紫朕所以期卿者甚遠毋留成命所辭宜不允仍斷來章

謝奕禮再辭恩命不允仍斷來章批答

閨門者王道之本后有進賢之志無私謁之心則公道
行而倅門塞紀綱立而名器重雖同氣何有乎濫恩卿

僚富貴而退遜服儒雅而謹勑后實嘉之于邑于謝寢廟既成禫衣歸省相祀有恪伯仲一日而授兩節度越常科恩義稱也免櫝來上謂除名盛典不容倖得而謙畏有加漢四姓罔克專美於前矣亟祇若予命所辭宜不允仍斷來章

光祿大夫右丞相兼樞密使鄭清之可特授特進拜左丞相兼樞密使加食邑食實封制

門下伊尹學而後臣商后所以懋格天之業周公相而

為佐成王所以綿卜世之休朕厲精百度之新注意一
賢之切望既孚於巖石位宜正於元台咸輯群工渙揚
大號具官某道包乎衆甫氣塞乎兩間其無我則顏氏
克已之仁其有為則曾子守約之勇升陽谷之日而春
萬象翊我初潛興太山之雲而雨八灑贊予更化即上
天下澤以辨分本內陽外陰而進賢凜諫路之復開紛
偉門之自塞回狂瀾於既倒坐消貪濁之風泝大川而
獨航期濟艱難之運惟宿弊不容於驟革而駿功有待

於美成修攘之務孔嚴安危之寄逾重匪進久虛之次
曷旋丕應之機是用稽之端拱趙普之元勲叅以咸平
李沆之舊德序陞左輔光踐前修總樞機於本兵超品
級於賜位仍陪多邑併行真僉以尊天官冢宰之權以
應太微上相之象於戲一德咸有莫大乎主善之為師
百志惟熙莫先乎任賢之勿貳予欲天緯之穆汝翼予
欲國棟之隆汝為予欲職業咸修汝明予欲形聲俱和
汝聽仰承尊帝籲俊之意益寃佐王治邦之功一人以

寧萬世永賴可

宣奉大夫知樞密院事兼參知政事喬行簡特

授金紫光祿大夫右丞相兼樞密使加食邑

食實封制

門下朕玩占泰象稽若乾文北斗璇璣之幹天樞既運
平于四序太微端門之列次相爰經緯于三光肆嘉宥
密之英夙稔弼諧之望誕揚制綺專告廷紳具官某秉
先覺之姿厲後凋之操學問貫穿於千古器能包括於

三才退然不勝衣充以至大至剛之氣淵乎其似道形為可觀可度之容徧儀禁路之華趣踐政途之峻力扶更化備罄陳謨惓惓乎任賢而去邪懇懇乎理內而禦外尚猷詢茲黃髮獨知籌慮之深咨岳有能奮庸咸謂延登之晚昧予匪質紹我前休宴紫雲之樓念民生之未裕開天章之閣虞國事之多艱楫舟必賴於蒸徒維夏匪資於一木參諸夢卜得爾者明庸合守文應變之長共致經體贊元之助仍揔提於樞管兼疊進於文階

申錫多奮併陪真采於戲仲虺為左而伊尹為右本一
體以相須名與在後而周公在前必同心而叶濟惟密
於補袞則無彌縫之迹惟妙於和羹則有調一之功惟
精神強則國勢張惟紀綱正則人心定俾予以治時乃
之休可

金紫光祿大夫知樞密院事兼參知政事曾從
龍可除樞密使督視江淮軍馬加食邑食實

封制

門下朕祇承鴻業遠慕駿功督江左之軍而國勢張晉
賴謝安之畧視淮右之師而皇威暢唐資裴度之籌顧
采薇治外之孔嚴宜烝民任賢之尤急妙簡元樞之望
盡提諸將之權肆諛剛辰式渙孚號具官某學醇而識
邃德厚而器閑蚤擅兩都之倫魁蔚為三代之王佐炳
謀國之智先見洞乎蓍龜勵事君之忠精誠貫乎金石
再踐政塗之峻獨顯宥府之崇一念慮必圖义於家邦
一訏謨必思安於社稷氣塞乾坤之大志期宇宙之清

克敷心腹之司宜佐股肱之郡屬鞬清蹕亞父細柳之
風慚邑麾城子雲長楊之賦眷言江塹粵若淮墉昔稱
南北畫限之區肯蹈東西分晉之轍茲太乙之神來格
久占福曜之臨而甲子之歷有開適應初陽之復趣迎
善氣特命元戎皇天付予有家莫重要衝之守寧王遺
我大寶適資艱運之扶維文武之全才蘊深沉之大畧
就陞使領仍衍井禽總表撐裏拓而定規模合前茅後
勁而受節度風生草木聲震山川聖策定則有功可必

應兵之勝真儒用而無敵何難外侮之平注倚非輕延
登有待於戲義問之拒逆亮收萬全於指顧之間張浚
之却偽齊奏三捷於談笑之頃朕方恢於祖烈爾宜邁
於前修衆益集則精神強列戍睦則首尾應亟蓄攘於
外侮用勸相於中興可

平齋集卷十四

欽定四庫全書

集部

平齋集卷二十一

十五至二十一

詳校官庶吉士臣瑚圃禮

主事臣呂雲棟覆勘

覆校官博士臣劉光第

校對官中書臣范來宗

謄錄監生臣徐清

欽定四庫全書

平齋集卷十五

宋 洪咨夔 撰

內制

左丞相鄭清之口宣

卿德尊朝廷勲在社稷欲重處中之寄宜膺虛左之求
宅揆奮庸揚庭孚號亟祇殊眷力濟丕平

右丞相喬行簡口宣

卿斯文砥柱有國元龜久樞紐之密旋趣鈞衡之對秉

綸言煥發輿望允諧亟祗予休共圖乃乂

左丞相鄭清之批答口宣

延登上宰翊贊中興增九鼎之尊安永三階之澄穆趣
祇成漁母事勞謙

右丞相喬行簡批答口宣

孚號大廷登庸碩輔允賴巨川之濟式隆巖石之瞻亟
效贊襄奚勤遜避

右丞相喬行簡批答口宣

朕寤寐治功延登耆德既協從於龜筮宜交濟於鹽梅
其遏牢辭以圖丕乂

左丞相鄭清之批答口宣

天祐成功帝眷良弼首陟泰階之峻亟圖鼎餗之和勉
為堅留母煩牢辭

知樞密院曾從龍同知鄭性之簽書陳卓批答口宣

外治有嚴中樞尤重必進與邦之彥迺凝基命之功勉
效勝籌母勤遜牘

樞密使曾從龍批答口宣

十乘董戎亟宜引道五兵置使奚尚循牆體予憂顧之
深寢爾撫謙之過

節度使謝奕昌批答口宣

卿世業章平家法陰馬寵陟齋壇之峻榮施先廟之崇
渙綺已孚翼函可遏

節度使謝奕禮批答口宣

卿椒掖流輝芝庭峙秀襲冠貂之積慶膺綬鵠之殊恩

朕授非私爾辭母屢

賜龍圖閣學士京西湖北路安撫制置大使兼
知襄陽府趙范兵部侍郎淮東安撫制置使
兼知揚州趙葵銀合夏藥勅書

卿望聳禁塗籌安邊閭屬履炎蒸之序備殫牧御之勞
宜錫上奩用頒內劑禦茲烈日揚我仁風

賜工部侍郎洪江制置使知建康府陳韞銀合

夏藥勅書

卿法從名流陪京重寄

餘同上

賜權兵部侍郎四川安撫制置使趙彥呐銀合

夏藥勅書

卿天派名流坤維重寄

餘同上

賜司農卿知慶元府兼沿海制置使游九功銀

合夏藥勅書

炎令司衡赫威燦石迺眷輔藩之彥具宣制閩之勞爰

錫珍良式資寶衛

賜右文殿修撰四川安撫制置副使兼知成都府丁黼銀合夏藥勅書

廼睠漢庭之彥具宣蜀閫之勞

餘同游九功詞

賜兵部郎官兼淮西安撫制置副使兼知黃州

楊恢銀合夏藥

廼睠漢庭之彥具宣淮閫之勞

餘同上

賜直寶章閣權發遣鄂州兼汾江制置副使張

元簡銀合夏藥勅書

炎令司衡赫威鑠石迺睠上流之寄具宣外禦之勞爰
錫珍良式資寶衛

賜鎮江府都統制王虎池州都統制趙邦永鄂
州江陵府副都統制樊文彬江州左軍統制權
管幹光州武定都統制司職事王忠銀合夏樂勅書
三庚御序萬甲分屯總戎律以良勞犯炎威而不憚宜
頒珍勅用示眷懷

賜平江府許浦水軍都統制董琳銀合夏樂勅書

三庚御序萬甲分屯護海道以良勞犯暑威而不憚宜
頒珍劑用示眷懷

賜帶御器械兼權管主馬軍行司公事兼知光

州孟珙建康府都統制兼知泗州李虎郢州

江陵府都統制兼權發遣德安府王旻興元

府都統制李顯忠鎮江府副都統制劉虎襄

陽府忠衛軍副都統制江海權沔州都統制

司職事陳昱權利州都統制司職事曹友聞

權廬州強勇軍都統制司職事王福利州後

軍統制權行管幹金州都統制司職事吳桂

銀合夏藥勅書

三庚御序萬甲行邊總戒律以良勞犯炎威而不憚宜

頒珍劑用示眷懷

賜龍圖閣學士京西北路安撫制置大使兼

知襄陽府趙范銀合臘藥勅書

卿任隆外閩威聳上游犯霜露以靡寧護風寒而良苦

爰錫衛生之寶用旌敵愾之勞壯爾精神寬予憂顧

賜權刑部尚書沿江制置大使兼江東安撫使

知建康府陳韋銀合臘藥勅書

卿佩囊法禁典鑰陪都凜水澤之中堅嚴風寒之外護
爰錫攝調之劑用昭膳倚之懷壯爾精神寬予憂顧

賜寶章閣待制沿江制置副使兼知郢州黃伯

固銀合臘藥勅書

卿承恩中戾建閩上游犯霜露以夙征護風寒而良苦

爰錫衛生之寶用旌敵愾之勞壯爾精神寬予憂顧

賜兵部侍郎淮東制置使兼知揚州淮東安撫

使趙葵將作監淮西制置副使兼知廬州尤

煆銀合臘樂勅書

朔雪方霏淮風更凜言念制垣之重備殫王事之勞爰
錫珍良用資葆塞增壯魚麗之氣茂揚鶴唳之威

賜權兵部侍郎四川安撫制置使趙彥呐右文

殿修撰四川安撫制置副使兼知成都府丁

補銀合臘藥勅書

卿分憂北顧制勝西垂犯霜露以靡寧護風寒而良苦
爰錫攝調之劑用昭眷倚之懷大振戎容亟蘇民瘼

賜太府卿四川總領兼撫諭使安矣仲銀合臘

藥勅書

卿分憂北顧宣指西垂

餘同上

賜司農卿知慶元府兼沿海制置使游九功銀

合臘藥勅書

卿坐綏海服密拱京畿凜水澤之中堅嚴風寒之外護
爰錫攝調之劑用昭眷倚之懷民瘼既蘇戎容益振

賜帶御器械兼權主管侍衛步軍司公事兼建

康都統制王鑑帶御器械兼權主管侍衛馬

軍行司公事兼知黃州孟珙帶御器械鎮江

都統制李虎池州都統制趙彥彥郢州江陵

都統制兼權發遣德安府王旻興元都統制

李顯忠平江府許浦水軍都統制劉虎權光

州武定都統制司職事于俊權利州都統制
司職事曹友聞利州後軍統制權行管幹金
州都統制司職事吳桂權江州副都統制楊
福興襄陽府忠衛副都統制江海鄂州江陵
副都統制兼知棗陽軍樊文彬平江府許浦
水軍副都統制兼知海州趙東淮西路鈐兼
權廬州強勇諸軍副都統制司職事王福權
管沔州都統制司職事和彥威銀合臘藥勅

書

卿等系出山西威行塞北慨朔風之未靜忘霏雪之為
勞賚以寶奩實諸珍劑用壯前矛之氣進圖破竹之功

賜端明殿學士同簽書樞密院事督視江淮京

湖軍馬魏了翁銀合臘藥勅書

卿推誠體國決計視師犯霜露以靡寧護風寒而良苦
爰錫上池之水用紓先乘之勞壯爾精神寬予憂顧

賜直徽猷閣公海制置副使兼知慶元府王定

銀合臘藥勅書

卿顯膺閫寄坐鎮瀛壠

餘同游九功詞

平齋集卷十五

欽定四庫全書

平齋集卷十六

宋 洪咨夔 撰

外制

國子司業張處除祭酒仍兼侍講制

勑具官某賢必希乎聖士必希乎賢朕欲新美天下之士親擇老成有賢望者為國子師士非幸與爾淵乎海濱之老也見幾而早邇覽德而肯來俾參師氏詔徵於虎門望其容則易直子諒之心生聽其詞則淵泉溥博

之義見而况樞衣問業於函丈之間者茲用進之大司成以專六德之教師道立而善人多豐芑所以為數世之仁朕其庶幾乎可

樞密檢詳袁肅除右司郎中兼權樞密副都承
旨制

勅具官某朕更張萬化首命一相筦文武之柄宰掾以
贊政理樞掾以參訏謨非深識厲精求治之意不在此
選爾學得其傳而邃於知氣集以義而勇於行端笏立

朝論議閣偉朕知其可大受也挈宏綱於省闈奠密旨
於殿陛肆兼命爾維時股肱大臣內欲為朕修天保以
上之治爾彌縫之外欲為朕舉采薇以下之治爾佐佑
之往欽哉可

右司郎中袁肅除太府少卿兼知臨安府制

勅具官某惟前寧人得名法從濬正大之源以養君德
折姦邪之氣以興人心學無不該用有未盡求諸一庭
詩禮之彥為我四方岳牧之資爾講貫有源業履甚度

盤根利器奏民庸而獨高熟路輕車聳朝望以更偉肆
簡都曹之最進參列寺之華典吾神臯資乃儒術俗久
壞而周南之化未浹政積弛而商邑之治未張澄精神
於百為妙機括於一轉迪若攷詩書之訓宣朕躬道德
之行民情咸熙國勢自重此非趙張三王所能知也往
遠乃猷用對予渥可

大理少卿李鳴復除大理卿制

勅具官某朕近觀勑令所編類舊典我孝祖宸筆遂事

點勘增修刪改曲當情法於恤刑之條尤加詳焉企慕
不已因親札以示輕用徒刑之戒廷尉天下平可不遴
擇爾表於西州儀於王朝心夷氣和藹然君子長者之
風迺者浮累之獄咨爾聽之簡稽得情弊成以宥而朕
好生之德被於貉隸達於窮髮之北良用嘉歎晉躋九
列帥屬棘庭使四方司政典獄咸知朕欽恤之意念之
哉刑期無刑以長我王國可

吏部郎中趙彥械除大理少卿制

勅具官某朕近觀勅令所編類舊典我孝祖宸筆逐事
點勘增修刪改曲當情法於恤刑之條尤加詳焉孰復
企慕因親札以示輕用徒刑之戒廷尉天下平可不遴
擇爾講學之粹操履之茂標的於公族而吏治更高司
臬江左諫奏平允一道無寃民入為望卽進參列棘四
方司政典獄於爾乎則焉刑期無刑以長我王國可

國子博士李大同除祕書丞仍兼崇政殿說書

制

勅具官某斯文在天地間前乎管百世之既往後乎鑰
百世之方來非諸儒誰屬爾以經明行修都倫魁之望
詩所謂如金如錫如圭如璧者也列在書帷據今訂古
以沃朕心具有師法朕甚嘉之繇博士進丞中祕仍懋
金華之業蓋將閱其中而肆其外用昌斯文豈特以鎮
吾群玉之府可

著作佐郎蔣重珍除著作郎仍兼崇政殿說書

制

朕甚嘉之繇佐譏進領著廷

餘同前

校書郎黃朴除著作佐郎仍兼崇政殿說書

朕甚嘉之進繇典校佐譏祕廷

餘同前

太常博士徐清叟太學博士葉味道並除祕書

郎仍兼崇政殿說書制

爾以經明行修都儒林之望

葉

朕甚嘉之繇博士進典中祕

餘並同前

秘書丞彭方除著作佐郎兼權侍郎官制

勅具官某斯文在天地間前乎管百世之既往後乎鑰
百世之方來非諸儒誰屬爾以經明行修都儒林之望
詩所謂如金如錫如圭如璧者也亟於祕邱攝組畫省
銓綜餘隙盡讀未見之書韜涵日富進之佐著蓋將閟
其中而肆其外用昌斯文豈特為時佳吏部哉可

秘書郎張洽除著作佐郎制

入典中秘讀未見書

餘同彭方制

敷文閣學士通奉大夫程珌該慶典轉正議大夫

制

勑奉壽危於長樂方深追慕之悲通禁籍於甘泉尚共
榮懷之慶有嘉宿德何愛崇階具官某學邃而識融履
純而養厚濟時竑議五雲六莖之和華國高文四璉八
蓋之古自玉堂之引去每宣室之興思胡扼虎闢尚閑
駒谷復非遽復已萌於碩果之餘睽不終睽必合於遇
雨之後首進班於穹閣仍賦廩於珮臺在爾初無慕爵

之心惟朕蓋有懋官之典肆加蕃錫庸侈殊私施戟方
新寧鬱起家之望佩囊惟舊母忘存闕之忠可

著作郎權司封郎官吳泳除軍器少監兼直舍
人院制

勑具官某朕親攬萬幾總飭百度與士大夫洒濯激昂
以追元祐思得軾轍掌我書命興起人心於播告之下
爾操行純茂文思汗濶本之詩書暢之莊騷太史體宜
演誥朕有戎監職優務省往服少事雍容討論推厲精

更始之意著之訓辭渾厚森嚴與越棘大弓同其古斯
無愧江漢之靈矣論駁以扶國是朕又於此觀爾之風
力可

禮部郎官兼學士院權直趙汝談除秘書少監
兼權直學士院制

勅具官某中興百餘年公族之直禁林惟淳熙間彥中
一人爾識度純明風槩凝遠杜門著書尚友千古皎皎
白駒之在空谷也泰道宏開勉為朕起南宮北靡文簡

而有法進參木天之峻仍直丹地之嚴選妙擢殊前後
間見爾其推朕厲精更始之意著之訓辭使四方萬里
咸曰大哉王言一哉王心是為稱職可

太府少卿何炳除司農卿制

勑具官某文帝一形錢穀出入之間貫朽粟腐其效立
見朕於國計登耗念之熟矣而大農經費常患於不贍
何也爾性行純固材諧通明蚤游办而有餘晚韜光而
更密入參治藏之府曾幾何日能聲著聞進長九扈將

以裕吾國也孰漏當窒孰蠹當除孰冗當節公爾忘私
毋憚叢劇庸稱予厲精政事之意可

金淵李榦並除太學博士制

勅具官某等科舉之學非所以淑士也必義理性命之
學明則多善士化更而新師選可不重乎爾抱負闔講
貫熟製錦劇邑弦歌藹聞可以為成均師矣敷暢與義
薰陶善性使諸生人人有舞雩詠歸之樂則吾與點也
可

太學博士葉應輔除國子博士仍兼景獻太子

府教授制

勅具官某模範賢關惠訓宗卽能茂明所學可以為胄

子師矣

餘同上

奉議郎袁立儒餌賞轉一官制

勅具官某間者均光襄房之役靡勞不酬爾才良氣雋
優於邊畫督餌以濟軍事不憚鞅掌禦侮制寇與有勞焉
朕方信賞以勸事功進官一列其懋承之保障最聞俟

有優擢可

全子材除淮西安撫副使兼知廬州兼計度轉

運副使制

勅具官某朕夢想東都迺眷西顧若昔濡須之築芍陂之屯郾城之士飽馬騰淝水之風聲鶴唳欲追往躅宅牧良難爾彊入而忠果達且武荆襄淮海倍著賢勞入塞朝列之華出鎮邊維之重四履綏靖三軍激昂令行陳頽之間氣薄漳藍之表朕嘉爾勇於徇國就畀帥旄

仍總飛輓用究多多益辦之韞惟和戰之議論不齊守禦之規模一定必量敵而進慮勝而會必臨事而懼好謀而成能圖萬全何往不濟尚勉之哉可

贈寶文閣學士楊邁特贈龍圖閣學士制

勅朕慨念漢宣入承大統博陸侯之定策方共致於中興復中翁之受詩胡獨成於長往密勿麟儀之舊淒涼馬鬢之新睠懷若存褒贈宜厚具官某抱古邃學事予初潛反覆發明盡詩書禮樂之奧從容規切必仁義道

德之言每尊所聞務藏諸用既授五龍而夾日忽比列
星而騎箕雜佩贈之莫究仔肩之益一鑑亡矣可勝珍
瘁之悲雖卹典之有加尚徽章之未稱峻陟淵圖之序
不增泉壤之光易文子之名死宜不朽錄叔敖之後生
與俱榮尚其營竟服我休寵可

黃壯猷何處信課最各轉一官制

勅具官某綜覈名實而信必其賞罰親政之急務也爾

守何處信貳輔藩有美政且能濬導利源坯室蠹穴版部課

賦入以最聞增秩賞能庸示予信其益厲精白以承可

右正言王遂除殿中侍御史制

勅具官某朕始親萬幾首得一士置在明目張膽之地
蔚有正色敢言之風神昂鑄而魑魅莫逢干將淬而犀
兕亦斷善類吐氣貪夫革心察之既稔所安用之不厭
其速甫躋諫列亟副臺端純仁之內出姓名蓋非輕授
趙抃之不避權倖抑所優為朕方虛己以受人爾亦得
時而行道難逢者風雲之胥會易失者日月之如流萬

古在前億世在後母替精白承休之節用為汗青傳遠
之圖可

吏部郎中兼右司李宗勉除監察御史制

勑具官某蓋聞淫朋去然後可以穀正人側媚屏然後
可以用吉士天運之往來消長此其機與爾和而趨於
中大而麗於正日用力於明善之學如恐不及游奉郎
最入儀郎省素絲一節未嘗以爵祿入於心諸大夫國
人皆信其為賢也朕方謹儉人充耳目之戒儀圖可御

史者莫如汝宜在易一陰不能勝五陽則決之於夬五
陽不可忽一陰則杌之於遇潛觀機括而制其微天下
可常泰也爾亦有辭於永世可

大理卿李鳴復除侍御史制

勅具官某朕稽家法之相傳睠臺綱之特重仁廟思得
忠厚淳誠之士裕陵務草澆浮薄惡之風蓋心直正則
無詭隨議論平則不沽激欲維吾國宜表若人爾秉心
澹夷蘊識精粹良吏之譽溢於外服吉士之稱著於中

朝甫陞卿月之華趣應法星之象維昔田錫暨於何矧
莫非西土之英列在南床之選幾年無此一旦得之春
秋之盡而不汚大闢榮辱洪範之會其有極一洗黨偏
百辟咸慕乎君子之中四方聳聞乎仁者之勇繫予所
屬惟爾其承可

秘書丞兼崇政殿說書李大同除右正言兼侍
講制

勑具官某師氏詔徵保氏諫惡皆有道之士為之朕厲

精求治之初增置經筵官相與講明五三六經之道以
養其源諸儒序進禕如翼如爾於其間鬚眉皓白氣肅
而辭莊淵乎其似道也朕退而自喜曰得一佳諫官矣
擢寘騎省仍侍籞廈逆耳沃心朕於爾乎嘉賴官守一
時之臧否言責萬世之榮辱毋憚嬰鱗有懷不盡然輒
輪折檻特赦過於已著望儀刑而意消不聞亦式不諫
亦入庶其置朕於無過之地乎可

呂殊除太學錄制

爾金玉其度而不苟售可以為成均師矣

餘同金
潤李集

大宗正丞蔡範除戶部郎中淮西總領制

勑具官某三表五餌不如晁錯實塞之策破羌強弩不如充國留田之奏綏禦皆不可廢夫守也爾名儒之胄良吏之表廉靜有立不為苟同宜出入省闈以緝庶務中原事機方集必事力之裕乃克濟庸輟爾以尚書郎給餉道往哉守淮所以蔽江而控河士飽而歌馬騰於漕淮西之成雋功以此出納有經而無壅利取予有權

而無近名足食足兵爾蓋優為之寓攻於守而不株其
守盍以方畧上可

歸順人李義承節郎張瑀李德魏珏保義郎制
勅具官某討叛以誼懷服以仁殲渠盜脅歸斯受之爾
能革心奚愛勇爵祇戴寬恩勉圖報效可

歸順人同鼎武翼郎王聞顯武翼大夫呼延實
來伯友修武郎制

勅具官某國家推天覆之仁舍逆取順豈以南北為間

爾等執羈綽以事異姓途窮力屈束身歸命朕不汝棄也易畀武級之勞母亡忠力之報可

廣州觀察推官魏國良歿於王事贈通直郎制
勅具官某嶺毗不靖爾挺身往諭恩信亦既勤止得疾
於行齋志以歿錄勞進秩尚慰九泉可

淮西路鈐范用吉授高州刺史節制京西北路

軍馬制

勅具官某昔年餘燼中原為墟關河方溪於來蘓陳穎

首歸於疆理上功莫府謂爾有勞亟陞遙刺之華仍總進屯之重祇承休渥益勵忠勤可

江陵府副都統孟珙特轉武經郎制

勑具官某方城為城漢水為池天險也制閭設險加嚴峙芻榦具畚重濬深培高屹然金湯之固第勞來上爾實程督進秩二等用勸事功可

平齋集卷十六

欽定四庫全書

平齋集卷十七

宋 洪咨夔 撰

外制

西和州守陳寅妻安人杜氏男基暨墮死節贈

官制

勅具官某妻氏男某人等西和嬰孤城抗敵力窮援絕
臣為國死忠子為父死孝妻為夫死義三綱立焉捐身
犯難人所甚難闔門殉節古亦罕見朕悲不忘優贈以

貴營魂往從爾夫子于廟食可

三子改
夫為父

西和州守陳寅族人立照璽館客李良臣死節

贈官制

勅具官某族人某館客某人等闕爾以族黨良臣爾館

於守義不苟免亦相從於死良用嘉歎贈秩以貴營魂

往從寅于廟食可

餘同

權兵部侍郎陳公益磨勘轉中大夫制

勅朕一日萬幾厲精方切三歲群吏考績尤嚴肆疇法

從之勞庸渙明緝之寵具官某操修無玷問學有源簪
筆雍容每罄論思之益效經密勿屢殚啓沃之忠繇積
日以效功爰歷年而會課賸賢雖舊詔爵惟新漢中大
夫之員寢高秩序周小司馬之職勿替謀猷可

祕書少監徐僑除太常少卿制

勅具官某禮者天地之序樂者天地之和夷變不兼命
也而簞瓢陋巷之士夫子遽以四代禮樂付之何哉爾
好古學行古道瞻彼淇澳其容比於禮考樂在潤其節

比於樂朕方網羅衆俊聚之本朝老成典刑思見如渴
擢貳蓬省翔而未集又舉奉常亞卿以進之時行則行
幡然一來講明王道於玉帛鐘鼓之外以善人心視獨
善有間矣毋使朕有齊魯二生之歎可

楊一夔父秉遷明堂恩封承務郎制

勅具官某父某人宗祀慶成均福寰宇高年尤吾所尊
禮爾稟厚養深年過九袞有子登名於奉常義方立矣
錫慶增封用勸好德可

廉靖不競越在外服治譽夙著顧善刀而藏之若將終身焉朕方收召四方俊乂以重周行起爾宰士又進爾治藏之長豈以貨賄出納為足以煩吾老成哉百辟卿士媚于天子不解於位民之攸暨尚求無媿于古可

資政殿大學士曾從龍明堂加恩制

勅朕紹祖宗之休蒙天地之貺十年養晦垂衣裳於巖廊三歲歲祠奉圭幣於重屋躬鑿高靈之墮嘉虞熙事之成迺眷時髦嘗參政柄有赫慶條之布於昭命綺之

敷其官某肅括而端方深沉而凝重涵今茹古學術兩
都之宗尊主庇民器業三代之佐孰復於安危之勢雍
容乎進退之幾終始幾年夷險一節東山之卧安石常
存憂世之心江左之見夷吾盍究濟時之畧登崇有待
注想惟深頃展采於合宮躬受釐於宣室肆頌祭澤增
錫圭龠以昭體貌之隆以後榮懷之盛噫靖四方於我
將之頌朕正切於儀刑卜萬壽於天保之詩彌無忘於
歸美趣承丕渥入告嘉謀可

資政殿學士葛洪明堂加恩制

勅朕稽周典九筵之規酌義經二簋之義禮從簡約誠罄精純玉瓚黃流哀時之對泰元神筭何天之休屬寢容之熙咸宜惠術之具舉疇咨舊德誕播顯綸具官某簡栗而廉剛大以直博學明辨非一日用力于仁特立獨行雖三公不易其介甫罄弼諧之益遽興恬養之思心廣而體自胖年高而德彌劭方詳延於俊乂每渴想於老成翊翊而神嘉虞雖阻受釐之間皇皇而帝宴饗

蓋均賜胙之恩申衍租奮光昭簡注噫烈文辟公之錫
祉福聿圖繼序之功黃耇台背之介壽祺尚篤乞言之
意體予辰畏告爾辰猶可

左諫議大夫鄭性之明堂加恩制

勅朕蒐儀先甲展采上辛賦思齊之詩制雖嚴於孝慕
稽我將之頌禮不廢於宗祈恍三靈之宴娛道百祿之
來下有嘉首諫宜錫閟休具官某抱陸贊之忠勵汲黯
之直深見遠識平國論於玉衡忠言嘉謨開君心於金

鑑其博大則廊廟之器其浚明則邦家之光啓沃方深
向用良切授策而拜泰一莫侍奉高之祠受釐而問鬼
神尚前宣室之席肆增華於騎省庸申衍於爰田雖舉
邦彝實均帝祉春秋承祀欲大祖功宗德之傳夙夜畏
威勿替天命人心之戒可

吏部尚書崔與之明堂進封南海郡開國公加
恩制

聿懷耆俊宜錫宏休具官某行峻而約之中氣剛而養

以直風槩高古秋霜烈日之嚴典刑鎮浮泰山喬嶽之
重游十行之趣召儼三命之滋恭展也達尊爛然全節
延英論事莫遑汗盛夏之衣宣室受釐猶思前半夜之
席肆肇開於公社仍申行於爰田繫舉邦彞寔均帝祉
積德而後興禮安得魯生之來為治不在多言勿替申

公之告可

首同鄭性之辭

敷文閣直學士知潭州余嶧除華文閣學士洪
海制置使知慶元府制

勅朕總治中朝分任外閫或統江淮表裡之勢或當襄
蜀風寒之衝迺勝鄞江近扼海道欲壯股肱之郡必求
方面之材具官某學明而履方氣充而用博操縱闔閭
莫窮應變之長卷舒屈伸不改有常之度擁甘泉之夙
望鎮長沙之介藩謂弄兵多出於無聊而患盜每生於
有欲風采一振號令具孚驩綠林之草心渺青草之息
警轉聞良偉簡在逾深寇恂之定潁川久徇借留之請
簫生之守馮翊更圖詳試之功陟奎閣之穹班總制垣

之重寄宏開四履爰控三韓惟威望聳則風颶浪舶之無虞惟恩信著則椎髻卉衣之來慕以至業相安於田里福并及於京師繫我譽髦奚煩多訓可

直秘閣新成都府路提刑趙彥覃除都大坑治
制

勅具官某國計莫重乎銅楮之相權朕出寶帑之儲歛宿楮而易之物價浸平又必鐘官能振厥職爾天支之秀周行之雋甫起家於蜀部舉闈府之權盡畀之進用

亟矣唐諸道置爐九十有九在東南為多地產今猶昔也爾能公以懲浮冗明以剔姦蠹敏以幹壅滯少府水衡之積何患不承平若哉可

太后山陵復土錢忠表趙若浚轉一官制

勅具官某等六驍復土五使置官允備馳驅悉霑賞賚爾祗吏役例進一階茂對恩榮免思策勵可

李安國特轉武節郎制

勅具官某比歲蜀閩失馭潰旅逆逸為民害甚於寇爾

薰染忠義奮揚驍雄扼險要待其來民恃以無恐果山
至今德之增秩旌勞俟有褒擢可

直秘閣知溫州游九功除司農少卿制

勑具官某良二千石入為九卿漢法也北海朱邑以治
行第一掌周稷之業蓋此其選爾膚敏而靜平易而正
京蜀荆閩屢更名郡剛不至貶柔不至坯民安其政而
有去思可謂良矣朕憲吏道放紛之獎循名責實思用
其良不俟東嘉上計以漢法選貳司均夫長於治民者

必優於裕國信能為朕養其和節其流而時斟酌焉錢
穀之間其紓乎可

林禧子封父承務郎制

勅具官某父某宗祀慶成均福寰宇高年尤吾所尊禮
爾稟厚養深年過九袞有子登名於奉常義方立矣錫
慶疏封用勸好德可

林禧子封母孺人制

勅具官某母某氏云云 母訓昭矣錫慶疏封用勸好

德可餘同

父

歸順人孫政鮑義邊寶張仲于德楊翼張彪張
實高三受張旺汲漢臣邢海蔡青魏成方元
郭通綦同張時並補承信郎制

勅具官某人等討叛以義懷服以仁殲渠貳脅歸斯受
之爾能草心奚愛高爵祗服寬恩勉圖報效

歸順人王元純補迪功郎制

爾嘗為士奚愛文秩祗服異恩勉圖報效可餘同

史復祖除刑部郎中制

勅具官某朕間者閏雨念中外獄吏奉吾法不虔逮繫
多淹上干和氣亟下宥減之令而雨憲部列屬必求知
朕意者爾靜而不浮謹而不迫明習於律令而不苛累
駕緹屏具有善譽輒郡而郎參聽四方之讞奏其選甚
高公則強禦不能欺恕則文致不能入勤則冗釁不能
困欽哉監于茲祥刑以達朕好生之德可

軍器監兼刑部郎官李直柄除大理少卿制

勅其官某我神宗定官制理寺卿一少卿二分左右聽
刑獄今圜土空虛治獄雖非宿其業可也四方奏讞萃
于斷刑業可不速乎爾憚幅近厚容氣儼肅習于舜士
師周司寇之典而以惻怛行之五為理官三為憲曹其
業宿矣爰命爾以亞卿斷天下之刑宥過無大刑故無
小能知此意則可以明于刑之中率乂于民棐彝念之
哉可

權工部尚書汾江制置副使知黃州兼淮西制

置使趙范除兩淮制置大使節制巡邊軍馬
兼沿江制置副使制

勑江為國之門戶淮為國之藩籬門戶嚴則謝元無後
顧之憂藩籬固則祖逖有前進之勢蓋出入運棹之如
意在表裡撐拓之得宜分外閩以相維總中權而尤重
具官某兼資文武世篤忠勞贊籌江漢之間隱若敵國
制勝淮海之表賢於長城功雖著而有謙抑之風氣雖
銳而有深沉之度知可屬於大事期共成於遠圖殘虜

宿讎歛一朝之就燼中原故壤莽萬里之為墟欲乘車
攻復古之機無出天保治內之畧孰強吾意爾壯其猶
拔諸八座之睽付以元戎之寄淮東西之星壘盡受指
揮江上下之雲屯參聽號令本之老成謹重之識行之
平定安集之心以守為攻以全取勝乃若秦人之鹿犄
角相資常山之蛇首尾俱應必能通脈絡於諸道斯可
會精神於一家迄躋中興用光前烈

趙凝除大理寺丞陶木司農寺丞趙崇蟲太府

寺丞姚璗國子監丞賈似道軍器監丞制

勅具官某等漢宣帝勵精求治綜覈名實以練羣臣黜陟有序衆職修理上下無苟且之意迄濟中興朕甚慕之爾蓋世業之華噐能精敏爾本儒林之望議論堅明爾崇嵒公族之彥材諱通暢爾璗決科之雋講習有源爾似道克家之美趣尚不苟廷尉太農太府有丞胄監戎監亦有丞往為我分治之丞者承也所以承輔其長使無曠職也政事文學理法之士繼自今咸稱厥職則

予以憚可

林申除宗正寺簿趙鎬夫司農寺簿趙汝遂太

府寺簿余元虞國子監簿制

爾申茂於踐踢聲華甚暢爾鎬夫勇於奮勵材術孔優
爾汝遂抱負純明志不苟售爾元虞涉歷詳練材不自
暴宗正大農太府胄監皆有簿往為我治之先簿正祭
器聖人猶不敢忽職業之盡也餘同上

趙汝訓除司農寺丞杜範軍器監丞李以制大

理寺簿章勸將作監簿制

爾汝訓秀於公姓材刃有餘爾範穎於儒紳業履甚度
爾以制金玉其質安雅自將爾勸弓冶其傳謹畏自飭
大農戎監有丞李寺戎監有簿往為我分治之丞以輔
其長簿以糾正厥違非特示進擢之榮也

上同

淮西安撫使機宜兼通判廬州劉子澄除軍器
監簿兼淮西安撫司參議官制

勑具官某邊閩上介之置非內地比中原事幾之集非

他時比故擇材尤謹爾氣稟與邁議論英發與聞經畧
西事之機籌亦既熟矣班王朝而長莫府厥任逾重深
沉者無躁謀老成者多遠慮爾乃贊乃牧圖全而制勝
功懋懋賞朕所不吝也可

國子監丞張翀除秘書監制

勅具官某寺監皆有丞中秘為高天球琬琰之出元圃
梗柟杞梓之生鄧林地望殊也爾學殖瓊粹材猷翹拔
蔚乎諸儒之穎丞我胄監不撓于法而教令行賢聞益

昭西崑群玉之府游其間者皆天下選爾往丞之地望稱矣本固則末茂形大則聲宏其益充所養以待方來之用可

太府寺丞尤焫除樞密院編修官兼權檢詳制勅具官某國朝經武要略一書尊閣於樞庭朕萬幾之暇親御翰墨作經武閣三大字扁之事增重矣職刪潤者宜稱爾涵負器識之高講明理義之熟固能不失所亨此致養所以致用也中興保大定功之略咨爾纂修

垂則於億世時政有紀會計有錄併以屬爾而檢詳兼
徂爾祖淳熙間嘗為之長慮却顧密贊幄籌求所以安
國家利社稷期無忝家傳之學可

平齋集卷十七

欽定四庫全書

平齋集卷十八

宋 洪咨夔 撰

外制

太府寺簿劉炳除諸王宮大小學教授制

勅具官某行葦忠厚內睦九族豈惟睦之必擇師儒以
玉其成爾西產之良邃於易能發明未盡之蘊其師表
于磐石綯繹義理切劘情性使成人有德小子有造則
予汝嘉可

軍器監丞謝奕禮除大宗正丞兼權兵部郎官
制

勅具官某丞郎朕所重非其人不輕畀爾韋平之裔有
詩禮之傳陰馬之族無富貴之累可謂雅器矣承我大
宗攝祖郎省豈特用為爾榮恭儉惟德恪勤迺事朕將
以是觀爾之致遠可

賈似道特轉奉議郎制

勅具官某朕建后於相家又命妃於法從而開雎之化

行進封有倣推恩惟稱爾襲芳弓冶之傳承暉四星之
首擢丞武監進秩二等奕奕光榮矣務學好修用燕多
祉可

度支郎中謝采伯除軍器監制

勅具官某吳越之劍取其地良紛胡之筈取其材美朕
觀諸此得器使羣工之道爾生相家而無驕氣地之良
也挹儒科而有能聲材之美也地良材美繇郎版部長
戎監疇不謂宜豈徒以肺腑進哉易之除戎詩之備械

書之敕胄敵干皆今急務毋視訓工程作為猥釀而不
之屑可

魏峻除太社令楊璪除籍田令制

勅具官某等社籍置令類以公卿佳子弟處之鸞停鵠
峙於梧竹間貴其稱也爾峻貂蟬世家風度凝粹爾璪
筆橐名裔氣稟開敏或司國社或掌帝籍列在容臺培
養遠器其益勵於學以對寵榮可

華文閣待制知瀘州魏了翁用明堂恩進封蒲

江縣開國男加食邑制

勅朕有懷時彥宜錫神釐具官某學貫乎古今氣塞乎
穹壤立朝素節挺朝陽之梧桐去國丹心凜歲寒之松
栢屬更張之伊始顧趣召之宜先頴川正急於借恂宣
室遂遲於見誼既底於治迺遄其歸維昔宗祈敷時餽
惠駿奔百辟曾齊胙之靡儀燕衍一賢胡魯膳之未至
宜爵升於穀辟仍戶衍於奮圭爾毋謂萬鍾之何加朕
方念四簋之不飽亟承顯渥入告嘉猷可餘同鄭性之

諸王宮教授蔡仲龍除太常博士制

勅具官某奉常禮樂之司王政由出朕方起者儒為介
卿以備諭訪博士參之宜得賢才爾醞藉其學詳雅其
度楷模宮邸蔚有賢聲端委佩玉據經以訂損益之文
折是非之議蓋裕如也彼度吾所能行而遷就焉朕安
取此

太社令李晞顏除大理司直制

勅具官某三尺法具在枉於舞文吏朕甚憫焉必得古

之遺直而後可為邦之司直爾詞藻有華業履有度
所居官惟法守是謹以是議法於廷尉不撓不折不憊
不濫而王道行皇極立矣枉已未有能直人則孟軻之
戒可

敷文閣學士李埴明堂恩加食邑實封制

勅具官某學博而識明氣全而節勁螭頭去國望久鬱
於論思豹尾行邊功獨高於綏定屬大權之親攬務衆
正之詳延首告李泌以東裝欲為賈生而前席正深樂

只宜亟來思維昔宗祈敷時峻惠肆疇采邑仍衍真僉
餘同鄭性
之魏了翁

戶部侍郎京湖制置使史嵩之明堂恩進封鄞
縣開國子加食邑制

勅具官某賦穎脫之才抱輜輶之畧從途榮顯侈世業
於韋平制閩崇嚴從聳軍聲於羊陸惟四履遐烽之絕警
故九筵精意之潛通禮既底於熙成福寧容於專嚮爵
升蒲璧戶衍僕圭帝命式於九圍朕既荷受球之寵天

威不違咫尺爾母忘拜胙之恭懋暢英猷對揚景況可

餘同

上

徽猷閣學士新知太平州鄒應龍明堂加恩制
具官某學擅掄魁望高法從居易以俟命初無徇世之
心充實而有輝未究濟時之蘊試望之於馮翊得汲黯
於淮陽雖廣合宮之詢尚遲宣室之見維時熙事丕舉
慶條肆加多邑之榮庸示名藩之寵綏我思成者在於
溫恪介爾景福者由乎靖共茂展英猷對揚休渥可餘同

華文閣學士知慶元府余嶧明堂恩進封信安
郡開國侯加食邑制

具官某學擅名儒材優法從長沙之稱吳芮久藉蕃宣
東海之得翁歸更需鎮撫雖緩受釐之訪靡忘籲俊之
思迺瞻明禋迄成熙事餕惠下逮於輝庖之賤朕膳上
親乎族姓之尊豈繄時髦可後祭澤肆進徹侯之重仍
加采邑之腴綏我思成在於溫恪云云餘同

上

楊汝明聶子述明堂恩進封加食邑制

具官某業擅名儒材優法從騎星辰於奎閣步武寢穹
挹風露於珍臺精神更遠屬改絃而更始每前席之興
思迺曇明禋迄成熙事惟予靡忘於寅畏爾母替於辰
猶可餘同

上

吏部尚書崔與之除端明殿學士提舉西京崇

福宮制

勅節誼天下之大閑而厲其節者在人主德齒天下之

達尊而褒其德者在朝廷朕眷懷東海之濱夙著南陽之望渴於見晚趣使來思顧抗志之何高宜疏恩之特異具官某純明而績學靜定而善謀東撫淮堧制勝紛拏之表西馳蜀道計安震擾之餘乃荷寧考簡知之深予冲人注想之切遲十年之圭覲游一旦之旌招委委之賁丘園儀圖共政囂囂之樂畝畝懇請辭行屹砥柱於患失之波歸靈光於戒得之境免從雅志丕振高風維元祐諸賢之方來獨范鎮屢召而不至進承明之祕

殿領崇福之殊庭茲復見於者英宜一循於優禮鳳翽
翩而亦集爰止朕雖阻於儀刑駒皎皎而母有遐心爾
尚殫於訓誥可

華文閣待制江西安撫使陳韁除權工部侍郎
兼江西安撫使知隆興府制

勅政令寬猛之垂而後有荷澤之姦民困饑寒之迫而
後有潢池之盜鉏萌芽則力易圖滋蔓則功難有嘉討
捕之勞庸示褒遷之寵具官某忠以體國儒而知兵遏

淮寇之鴟張威名早暢殄閩兎之蠡起籌略更高綠林
動於循梅黑祲被於汀贛跳梁莫制震蕩靡寧朕合三
道而建元戎爾鼓諸將而鏖劇賊訪鴻鴈於棘荆之下
追猶鼯於篁竹之間左翦右屠而禽其良既大懲於弗
靖下筦上算而安斯寢遂咸樂於有生以數年宣力之
勤底一旦成功之偉宜進班於起部仍宅牧於洪都勉
為朕留益振如虎如貔之氣盡除民蠹永凝買牛買犧
之風可

大理寺丞鄭伯謙差知常德府提舉德澧辰沅

靖州兵馬制

勅具官某武陵枕重湖帶五溪民夷錯處牧御非易必
熟知德意者往綏之爾厚而不浮莊而不撓正於廷尉
惻然惟恐一民之寃德意蓋熟之矣出布藩條旁制四
郡奉法循理以康乂民夷俗亦將聞風而帖服本正則
末治也朕方以責實課吏爾求為可知嗣對光華之渥
可

復中大夫直龍圖閣致仕季衍特贈通議大夫

制

勅具官某天未有久而不定者士君子所以不急乎人之知而斲乎天之知也爾公而忠廉而直所至厥績用茂顧以閑退終人勝天乎朕思起事功於積弛而才之難九京莫作良深悼歎既還爾秩又寓直義圖進兩階以追榮之天者定矣魂而有知歆此愍章可

新知西外宗正事趙彥紹乞休致除直祕閣官

制

勅具官某奔競成俗如水趨下有安於命誼而無得心
吾能尊顯之爾業履平實治行廉靜嘗為部刺史通顯
矣耻於浚常之求甘從肥遯之樂讀書求志若將終身
朕起之外宗曾莫能奪何卷懷之深耶寓直木天優游
閒館身愈退而愈榮可以媿世之嗜進而務得者可

王儀特轉朝奉郎致仕制

勅具官某仕者以員外郎致其事則澤及後嗣非會課

應格不可倖得爾疏通而勤敏嘗貳安慶板築之功居多引疾告老進秩一等不俟積闋遂郎員外殊恩也歸而教忠尚其無斁可

朝散郎直祕閣李燔特轉朝奉大夫直華文閣致仕制

勅具官某朕新美政化民獻有十夫予翼方來而未艾也胡一賢之不憇遺爾早從諸老之游熟講有用之學果達而藝成從政何難時未可為則卷而懷之時可為矣

則歲不爾與果制於命也耶陟序正郎陞華奎閣榮其
歸老示我惜賢可

歸順人偽防禦使樊辛特補武翼大夫忠州刺
史淮西兵馬副都監制

勅具官某淮右鞠旅汝南歸疆爾有簞食壺漿之迎我
無亡矢遺鏃之費肆加知義易授寧階往分刺郡之榮
仍領護戎之寄勉殫忠力用答殊恩可

李大謙特轉朝議大夫依前直寶章閣致仕制

勅具官某竭忠盡瘁者人臣之職分榮始厚終者人君之恩禮爾寬平而栗精練而介吏能著聞久矣輒從郎省司臬左淵皇皇臨遣精神尤炯然也亡幾何遽以謝事告良用閔惻華之奎直佚之祠館又陞之元士始終恩榮爾尚奚憾可

寶謨閣待制致仕毛憲明堂加恩制

具官某松階凝邃了忘勢利之榮栗里蕭閑自適性真之樂屬勵精之更始每籲俊而興思肆衍邑奮之富庸

增家食之華予方篤養老乞言之意爾無忘歸美報上

之忠可

餘同魏了翁等制

許應龍除禮部郎中制

勅具官某朕親政以來除南宮郎者再西垣北扉斧藻
王度皆由此其選爾幼襲荃蕙之芳步武珩璜之節璧
海瀛山休問籍甚望郎出守挹汗瀾之澤於潮學益老
矣撰遺草奏摯之華峻能以博古之識昌用世之文其
昇也熟御可

司農寺丞傅壅除都官郎中制

勅具官某周司隸總冗辱之役屬秋官漢都官從事掌中郎官不法屬司隸今充曹憲部掣令隸士職古而事簡爾儒術通明吏事詳敏累綰郡紱綽有治行蓋能世其家者涉筆農扈甫謂之來賜墨隃糜趣進厥序其欽飭百隸使不枉於法以培卿用之望可

淮西強勇軍統制呂深轉武經郎制

勅具官某迺者山東逆儔敢犯王畧大振貔虎之氣亟

正鯨鯢之誅制閩第功爾嘗鏖戰進官三列仍統一軍
其日夕淬厲以稱信賞可

趙汝遇除度支郎中制

勅具官某地官帥屬以經邦用司金職其入司度司其
出贏虛所關維材是授爾敭歷中外以老成精練聞國
費積冗軍調紛集楮幣鹽筴術窮而莫繼爾其精意計
度量入為出斟酌損益而圖厥中毋徒委諸有司之吝
可

安恭行除大理寺簿制

勅具官某朕緬懷光朝樞臣保蜀之勲而庶其報既擢其子又錄其孫爾競爽而敬敏王父所鍾愛也承郡東川方騰善譽簿正棘庭趣登華綴三世有績於朝榮矣哉仕優則學圖稱厥家可

利州路轉運判官陳隆之除直寶章閣權知沔州兼利州路提刑兼提舉制

勅具官某蜀號天險沔當要衝積五百年之經營空於

一日之蹂躡孰寬憂顧宜得偉材爾氣銳於理紛術優
於應變祁山斜谷之遺蹟木牛流馬之故智紬繹蓋精
輒從漕輓往圖控禦合兩節全閭以重其行爾能以公
滅私一意國事阨塞當築保塢當修流離當集疲弱當
練悉為朕挽舊觀而回之進可以瞰秦隴退可以敝梁
益則維汝功可

利州路提刑王翔除利州路轉運判官制

勅具官某武侯用蜀每患餉道之不繼以木牛流馬為

未足而雜耕渭上規模遠矣朕訂古謀今慨然于懷爾
志氣宏壯材猷瓌達周旋劍棧之表具著勞效繇憲而
漕豈特以平時將輸望爾關隘空於寇攘閭井蕩於兵
燬舊規猶未還也爾其以堅力行實政安輯流離經葺
荒墜使民趨生業之樂則兵享耕屯之利西顧庶其寬
乎可

平齋集卷十八